

La Quotidiana 26-3-2013, p. 3

Fusiunan er ils burgais?

(rtr) Da las vischnancas che han fusiunà a Glion/Ilanz han sis vischnancas ina vischnanca da burgais. Quellas sis organisaziuns han pliras pussaivladads co ch'ellas pon s'organisar en l'avegnir. En lur decisiun èn ellas autonomas. Tut tenor co ch'ellas decidan ha quai dentant influenza era sin las autras vischnancas burgaisas.

Mintga vischnanca da burgais po decider denter pliras pussaivlas variantas. La pli simpla fiss quella da schliar l'organisaziun da burgais e surdar tut il possess a la vischnanca politica. Sche tuttas sis vischnancas fan quai na datti nagina vischnanca da burgais en la nova vischnanca da Glion.

Quai na vegn dentant strusch ad esser il cas che tuttas vegnan schliadas, ha manegià *Marcus Valaulta*, il president da la vischnanca da burgais da Rueun. El vesa ch'i vegn a dar ina vischnanca burgaisa sur l'entir intschess da la vischnanca fusiunada. Tut ils burgais da tut las vischnancas fusiunadas vegnan a furmar quella vischnanca da burgais. Quella vischnanca da burgais vegn realisada perfin sche be ina vischnanca da burgais existenta dad ussa giavischa quai.

La varianta trais è la pli nunprobabla. Las vischnancas da burgais pon fundar ina societad da burgais. En quella societad vegniss lura mess il possess da tut las vischnancas da burgais da l'intschess da la fusiun.

Sch'ina vischnanca da burgais n'è betg da la partida è quella varianta automaticamain bloccada. Plinavant sclauda quella varianta la pussaivladad da salvar vinavant ina vischnanca da burgais.

Decider ston las vischnancas fin la fin da quest onn. La varianta la pli probabla è quella d'ina nova organisaziun da burgais en la vischnanca Glion/Ilanz, ha manegià Valaulta. Quai dess alur ina vischnanca da burgais da pulita dimensiun. Ins quinta circa 1500 burgais per la nova vischnanca da burgais da Glion.